

Guangjisi Minzcu Bau

ganhhau: CN45-0036 B.2020 Nd.2 Ng.26 liggaueq gengcej nienz ndwengeih coseiq

广西民族报

(壮文版)

主管主办: 广西壮族自治区

区民族宗教事务委员会

编辑出版: 广西民族报社

出版期数: 总第 3412 期

Vujmingz Gih Cietsaed Doicaenh Hong Vah Saw Minzcu Vunznoix

Geij bi neix daeu, Vujmingz Gih nyinhcaen gvancez hengzguh gij cwng-cwz sawvah minzcu dangj caeuq guek-gya, cungfaen baujcu dangj gienzik habfap vunz lai minzcu vunznoix, daegbied dwg Swcigih Yinzda Cangz-vejvei bi 2018 ndwen 5 fatbough 《Aen Diuzlaeh Vah Saw Minzcu Vunznoix Gvangsiah Bouxcuengh Swcigih》(bailaj genjdanh heuhguh 《Diuzlaeh》) le, Vujmingz Gih hengzguh 《Diuzlaeh》gak hangh gvidingh, youq hong vah saw minzcu vunznoix fuengmienh aeundaiej baenaj moq, daezswng moq.

Gig yawjnaek, giengzvaq roxyiuj. Aeu hong vah saw minzcu vunznoix gyahaeu Vujmingz Gih gak cin, gak danhvei nienzdoeh cizyau gaujbingz cijbyauh dijhi neiyungz, baenz caengz baenz caengz doeksaed cizcwz, baujmaenh hong vah saw minzcu vunznoix miz vunz ca, miz vunz guenj, miz vunz

doeksaed, miz vunz dukbanh.

Giengzvaq senhconz cienzdoh, guhbaenz gij heiqfaenh naekna saedhengz 《Diuzlaeh》. Dingjmaenh yungh “hag fap yungh fap, senhconz bujfaz, yiemzgek hengz fap”, laebdaeb haiguh senhconz cienzdoh 《Diuzlaeh》, lai caengzmienh lai loh haiguh bujfaz haiguh 《Diuzlaeh》 senhconz hozdung. Haenqrengz saedhengz 《Diuzlaeh》 senhconz hauej yanghcin, hauej segih, hauej hagdangz, hauej gihgvanh, hauej giyez daengj hozdung.

Doidoengh 《Diuzlaeh》 gvancez doeksaed, daezsang gij suijbingz hong vah saw minzcu vunznoix. Vujmingz Gih guekgya gihgvanh, swyez danhvei, gak aen yanghcin gihgvanh caeuq hingzcwngcunh(segih) “sam vej” baiz, aenyaeng hingzcwng danhvei gihbwnj cungj guh daengz gveihfan yungh Cuengh Gun song cungj saw. Bued

roengz 464.86 fanh maenz saedhengz doengh gij hanghmoeg daezswng hwnjguh hawsingz gyaudoeng sezsih, guh moq baiz dazroen miz Cuengh Gun song cungj saw 226 gep, 39 diuz roen miz baiz dazroen yungh Cuengh Gun song cungj saw, caemhcaiq cang gyaue lohdaeng henz roen, cungj yaenq miz doz Mancuengh, aennyenz Bouxcuengh.

Cietsaed guh ndei hong gungganq vunzcaiz. Bingzdingh fazgvanh song vah 3 boux. Fazgvanh culij doenggyaq gauj gij naengzlig yungh Vahcuengh miz 7 boux, liedhauej aencang vunzcaiz bwhlaeng Vahcuengh Guengsae faz-yen. Vujmingz Gih hagdangz son Cuengh Gun song sawvah gyalai daengz 13 aen, hagseng ndaej hag Cuengh Gun song sawvah 12000 lai boux, vunz guh lauxsae son Cuengh Gun song sawvah 38 boux.

(Veiz Hwngzli)

SIUSIK DINJ

● Oij dwg Dwzbauj Yen “5 + 2” daegsaek canjnieb ndawde cungj ndeu, bineix aen yienh neix gij yinvu maeuzveh dajndaem oij dwg 2.5 fanh moux. Vih baujmaenh habseiz dajndaem oij, daezsang canjlieng caeuq yauqik, hai cin doxdaeu, youq laj cenzdiz baujmaenh ancienz guhhong, Dwzbauj Yen gaenxmaenx dazyinx gyoengq vunz ganj seiz dajndaem oij, miz bouhloh haiguh cae naz, dajndaem oij daengj hong.

(Lij Suzbingz)

● Mboengqneix, Sihlinz Yen Vwnzva Dijyuz Gvangjden Caeuq Lijyouzgiz dangjcihu cujiz dangjyenz bae daengz Bujhoz Myauzcuz Yangh Vwnzyaj Cunh, Bingzanh Cunh dieg gamcaek yawhfuengz gaemhanh binghra q yawjgonz camnai gyoengq vunz souj youq dieg gamcaek haenx, soengq raemxmboqgvangq, yinjliu, mienhfuengbienh, mak daengj doxgaiq, bae hawj gyoengqde, gyo' mbaiq gyoengqde souj youq gizhaenx.

(Hoz Gencwz)

● Baenz binghra doxdaeu, Bahmaj Yauzcuz Swciyen cujiz dangjyenz ganbu, fatdoengh gyoengq vunz lai, haiguh hong yawhfuengz gaemhanh binghra. Mboengqneix, mbwn dauq raeu ndit, vih bauj bineix nungzyez ndaej fungsou, vunzguhnaez aen yienh neix guh ndei fuengzhoh banhfap le, haenqrengz haiguh seizcin dajndaem.

(Liengz Sauwnh)

● Ndwen 2 ngoenz 21, Dasinh Yen geij boux canghdaeqgyaeu bouxcoz gag gapbaenz aendoih gagnyienh fugsah, bae daeq gyaeu hawj 50 lai boux vunz guhhong youq itsienq haenx mbouj aeu cien, gajgez gij vwndiz vunz guhhong itsienq youq mboengq binghra daeq gyaeu hoj, hawj gyoengqde mbouj miz youheiq baihlaeng, demgiengz gij saenqsim caeuq gietsim gyoengqde hoenx binghra.

(Vangz Yibingz)

Sanhyangh: Youq Ranz Dajsiuq Bang Vut Gungz



Ndwen 2 ngoenz 23, mehmbwk Duncuz youq Sanhyangh Duncuz Swciyen Dunczloz Myauzcuz Yangh Dunczloz Cunh Mbanjbingzhiz daemj man. Seiz binghra neix, bouxswncienz feihyiz swcigih gaep huqsiuq Duncuz Veiz Cingvah yungh seiz mboengq binghra youq ranz, daiq mehdajsiuq dangdieg youq ranz daemj man, dajsiuq, haenqrengz cie dan feihyiz dinghdan, hawj “dinfwngz byai fwngz” bienqbaenz “ginghci byai fwngz”, hawj mehmbwk Mbanjdung youq ranz couhnieb bang laisou, saedyienh fuengz raq, couhnieb, vut gungz daengj aen moegbiu lai hingz, vih Sanhyangh dwkhingz ciengqciengq vut gungz gungeng ok gij rengz mehmbwk. Ndaw doz dwg mehmbwk cingq daemj man.

(Gung Bujangh/龚普康)

Lozcwngz: Mbanjbya Mulauj Ciengqgok Fwen Fuengz Raq

“Aeu dingq dangjcwng dazyinx guh, mbouj guh vahgyaj mbouj cienzyaj; daengx guek yiemzfuengz binghdoeg lah, hoenxhingz binghdoeg gvaq ngoenzndei.” Ndwen 2 ngoenz 20 banhaet, youq Lozcwngz Mulaujcu Swciyen Swbaj Cin, aendoih gwed geizdangj, rag aen yaensieng, dawz vahdoengz ndeu, ciengq fwen bae gak mbanj henzgyawj cunz. Sing fwen goksasa yinx ndaej haujlai vunzmbanj haeuagyawj dingq.

Aendoih fwen neix yienzlaiz dwg aendoih diuq fouxgvangjangz Swbaj

Cin Dimwnz Cunh, aenvih binghra yingyangj, seizneix mbouj ndaej diuq fouxgvangjangz lo, vihneix gyoengqde gag bien gag yienj fwen fuengz raq, yungh fwen daeu senhconz gij cihsiz fuengz raq. Fwen dwg gij vwnzva Mulaujcu, hix dwg gij soujduenh youqgaenj gaxgonq gyoengqde yungh daeu cienzndenq saenqsik.

“Yungh fwen daeu senhconz fuengz raq, gou nyinhnaeuz ndei dahraix. Haujlai vunzgeq ndawmbanj mbouj rox saw, hoeng gyoengqde dingq rox fwen, hix geiq ndaej neiyungz, miz-

mbangj lij rox ciengq dem, gyoengqde haenggyaez dangqmaz.” Vunzmbanj Dimwnz Cunh Liu Sidenz haenh aendoih fwen neix naeuz. Caeuq fat mbaw dan senhconz doxbei, fwen fuengz raq ndeidingq youh hawj vunz lai haenggyaez, vunz lai cungj gyaez dingq, mizmbangj lij doiq fwen dem, mboujdan ndaej cienz gij cihsiz fuengz raq hawj gyoengq vunzgeq, lij hawj mbanjbya Mulauj aenvih binghra caemrwdrd haenx gyalai haujlai nauhyied.

(Vuz Meijyungz Cinz Yenzdauh/吴美蓉 陈元涛)